

Հաստատում եմ՝



ԵՊՀ հումանիտար և հասարակագիտական
մասնագիտությունների գծով
պրոֆեսոր Ե. Ասրիյան

« 02 » _____ 2020թ.

« _____ » _____ 2020թ.

ԱՌԱՋԱՏԱՐ ԿԱԶՄԱԿԵՐՊՈՒԹՅԱՆ ԿԱՐԾԻՔ

Մանե Վովայի Խաչատրյանի «Մարդու իրավունքների վարչաիրավական պաշտպանությունը Հայաստանի Հանրապետությունում» վերտառությամբ ԺԲ.00.02- «Հանրային իրավունք (սահմանադրական, վարչական, ֆինանսական, մունիցիպալ, բնապահպանական, եվրոպական իրավունք, պետական կառավարում)» մասնագիտությամբ իրավաբանական գիտությունների թեկնածուի գիտական աստիճանի հայցման համար ներկայացված ատենախոսության վերաբերյալ

1. Մանե Վովայի Խաչատրյանի (այսուհետ՝ հեղինակ) «Մարդու իրավունքների վարչաիրավական պաշտպանությունը Հայաստանի Հանրապետությունում» վերտառությամբ իրավագիտության թեկնածուի գիտական աստիճանի հայցման աշխատանքի (այսուհետ՝ աշխատանք) արդիականությունը պայմանավորված է հետևյալ հանգամանքներով:

Մարդու իրավունքների և ազատությունների վարչաիրավական պաշտպանության խնդիրը՝ հակամարտությունների ու բախումների պակաս չունեցող ներկայիս հասարակության մեջ բավականին բարդ է, և դեռևս պահպանվում է այն քաղաքականացնելու, դրանով իսկ այն անհրակի խոցելի դարձնելու վտանգը: Մարդու

իրավունքներն առավել հաճախ խախտվում են հանրային հարաբերությունների ոլորտում, որտեղ գործադիր իշխանությունն առավել հակված է իր վարչական կառուցակարգերն ու լծակները ծառայեցնելու գերատեսչական շահերին: Այս երևույթը գոյություն է ունեցել դեռևս վաղնջական ժամանակներից և, թեև, փոքր-ինչ ձևափոխվել է իրավաքաղաքական մշակույթի զարգացմանը զուգահեռ, այն դեռևս առկա է հանրային հարաբերությունների տարբեր ոլորտներում: Գրախոսվող ատենախոսությունը նվիրված է նշված ոլորտում առկա տեսաիրավական հիմնախնդիրների համալիր ուսումնասիրությանը:

Այս համատեքստում հեղինակին հաջողվել է սպառիչ ու ներքին հետևողական տրամաբանությամբ անդրադառնալ ուսումնասիրության նպատակին և խնդիրներին, հետազոտության նյութ դարձնել ընտրված թեմայի առավել արդիական հարցադրումները և առաջարկել որոշակի գիտագործնական լուծումներ:

Աշխատանքի հիմքում դրված են անհրաժեշտ գրականության աղբյուրներ, ինչպես մայրենի լեզվով, այնպես էլ՝ օտարալեզու, այդ թվում՝ ներպետական և միջազգային իրավական ակտեր, դատական ակտեր, իրավական ակտերի նախագծեր, որոնց վերլուծության և դրանցից օգտվելու կտրվածքով հեղինակը դրսևորել է պատշաճ ունակություն և հմտություններ:

2. Ատենախոսությունը շարադրված է հետազոտական մեթոդաբանությամբ, այն ներառում է որոշակի ինքնուրույն դատողություններ և եզրակացություններ, որոնք ուղեկցվել են անհրաժեշտ հիմնավորումներով, համալիր փաստական նյութով և օրենսդրական փոփոխություններ կատարելու առաջարկություններով:

Ընդունելի է Հեղինակի կողմից իր տրամաբանական եզրահանգումները ու մոտեցումները, այդ թվում՝ օրենսդրական առաջարկությունները համակարգված տեսքով աշխատանքի եզրակացության հատվածում ներկայացնելը:

Թեկնածուական ատենախոսության արդյունքները կարող են կիրառական նշանակություն ձեռք բերել, քանի որ հեղինակին հաջողվել է դրսևորել որոշակի ինքնուրույնություն, ներպետական օրենսդրությունը, ինչպես նաև միջազգային իրավական փաստաթղթերը համարժեք ընկալելու և իրավական հիմքերը կատարելագործելուն

ուղղված համարժեք առաջարկություններ ներկայացնելու կարողություն, թեմային առնչվող տեսական աղբյուրների հաջողված իրազեկվածություն և այլն:

3. Թեկնածուական ատենախոսությունը բաղկացած է ներածությունից, երեք գլուխներից, եզրակացությունից և գրականության ցանկից:

Ատենախոսության մեջ բացակայում են խրթին մտքերը, չկան էական քերականական և շարահյուսական կանոնների խախտումներ, վրիպակները և սակավաթիվ են:

Աշխատանքի կառուցվածքն իրավական ընկալունակության տեսանկյունից ընդունելի է և ընտրված հարցադրումների ցանկի հետ միասին հնարավորություն է տվել ապահովելու հետազոտության ամբողջականությունը և եզրահանգումների հիմնավորվածությունը:

4. Գրախոսվող աշխատանքի կապակցությամբ ունենք հետևյալ դիտողությունները.

1. Պաշտպանության ներկայացրած երկրորդ դրույթի ներքո հեղինակը փորձել է տալ «վարչաիրավական պաշտպանություն», «պաշտպանության ձև» և «պաշտպանության միջոց» եզրույթների բնորոշումները: Ըստ հեղինակի՝ «մարդու իրավունքների պաշտպանության վարչաիրավական ձևերը» դրսևորվում են պետության Սահմանադրությամբ, սահմանադրական օրենքներով, օրենքներով և ենթաօրենսդրական ակտերով ամրագրված հանրային իշխանության մարմինների և դրանց պաշտոնատար անձանց՝ մարդու իրավունքների պաշտպանությանն ուղղված այն գործունեության ընթացքում, որը նպատակաուղղված է մարդու իրավունքների խախտումների կանխարգելմանը, հայտնաբերմանը և վերացմանը: Այլ կերպ կարելի է ասել՝ օրենսով սահմանվում և ամրագրվում է, թե որ ինստիտուտը և ինչ կամզմակերպաիրավական ձևերով է իրականացնում իրավունքների պաշտպանությունը:

Մեր կարծիքով՝ որոշակի վերապահումներով պետք է ընդունել պաշտպանության ներկայացվող դրույթներից որոշները (2-րդ դրույթը, «մարդու իրավունքների պաշտպանության վարչաիրավական ձևերը» հասկացության բնորոշման մասով, 3-րդ, 4-րդ):

Մեր կարծիքով՝ պաշտպանության ներկայացվող յուրաքանչյուր դրոյթ իրենից ներկայացնում է որոշակի գիտական գիտելիքների և գիտական մեթոդաբանության հիման վրա կատարված այն ընդհանրական եզրահանգումը (գաղափարը), որը հեղինակը առաջ է քաշում գիտության կոնկրետ բնագավառում էական նշանակություն ունեցող խնդրի լուծման համար: Մեր կարծիքով՝ մարդու իրավունքների պաշտպանության վարչաիրավական ձևերը՝ հասկացության վերոնշյալ ձևակերպումը չի համապատասխանում գիտական նորոյթին ներկայացվող պահանջներին: Բացակայում է «մարդու իրավունքների պաշտպանության վարչաիրավական ձևերը» հասկացության բովանդակային սահմանում, այլ կերպ բացահայտված չեն այն էական հատկանիշների համակցությունը, որոնց ամբողջության հիման վրա կարելի է նշված հասկացությամբ անվանվող երևույթը տարանջատել նմանատիպ այլ երույթներից: Հեղինակը «մարդու իրավունքների պաշտպանության վարչաիրավական ձևերը» հասկացության վերաբերյալ նույնաբովանդակ դիրքորոշում է հայտնել նաև աշխատության 63-64-րդ էջերում:

Պաշտպանության ներկայացվող դրույթների ձևակերպման համար կիրառվող «միջոցառումների ամբողջական շրջանակ», «նոր չափանիշներ» եզրույթները բավականին անորոշ են: Դրանք հնարավորություն չեն տալիս առնվազն ատենախոսության՝ «պաշտպանության ներկայացվող դրույթներ»-ը հատվածում պարզելու հեղինակի՝ որոշակի գիտական մեթոդաբանության հիման վրա կատարված ուսումնասիրությունների արդյունք հանդիսացող գիտական ընդհանրացումները, եզրահանգումները:

2. Պաշտպանության 5-րդ դրույթում հեղինակը նշում է. «... գտնում ենք, որ պետք է օրենսդրորեն ամրագրվեն մարդու իրավունքների պաշտպանության իրական երաշխիք հանդիսացող այլ դրույթներ նույնպես, մասնավորապես՝ յուրաքանչյուր վարչական ակտում հարկ է անդրադառնալ այն հարցին, **թե արդյոք տվյալ իրավական ակտը կամ վարչարարությունը ենթակա է բողոքարկման, ինչ կարգով և այլն**»:

Մեր կարծիքով հեղինակի նշված տեսակետը պետք է ընդունել որոշակի վերապահումով, քանի որ «վարչարարությունը» որպես գործընթաց ինքնին բողոքարկման օբյեկտ և/կամ/ առարկա չի հանդիսանում: Բողոքարկման օբյեկտ է վարչարարության

արդյունքում ընդունվող նորմատիվ և/կամ/ վարչական ակտը, ինչպես նաև վարչարարության տեսակ հանդիսացող գործողությունը/անգործությունը/, որն անձանց համար առաջացնում է փաստական հետևանքներ: Նշված եզրահանգման իրավական հիմքը «Վարչարարության հիմունքների և վարչական վարույթի մասին» ՀՀ օրենքի 3-րդ հոդվածի 2-րդ մասով ամրագրված դրույթն է: Եթե հեղինակը ատենախոսությունում «վարչարարություն» հասկացությանը տվել է այլ որակական հատկանիշներ, քան տրված է օրենսդրորեն և գտել է, որ վարչարարությունն ինքնին բողոքարկման օբյեկտ է, ապա վերջինս աշխատանքում պետք է պաբահայտեր այդ հատկանիշները:

3. Պաշտպանության ներկայացվող 6-րդ դրույթում հեղինակը նշում է. «*դիմելու իրավունքի իրացման անկատար իրավակարգավորումները կարող են չարաշահումների փոփոխություն և՛ վարչական մարմնի (պաշտոնատար անձի), և՛ քաղաքացիների կողմից: ... դիմելու իրավունքի իրացման շրջանակներում չարաշահման կանխման համար անհրաժեշտ են հավասարակշռված իրավակարգավորումներ...: Վարչական մարմինների կողմից իրավունքի չարաշահման կանխման նպատակով իրավակարգավորումները պետք է համապատասխանեն առնվազն հետևյալ չափանիշներին...»:*

Մեր կարծիքով «հավասարակշռված իրավակարգավորումներ» ամրագրելու առաջարկն ինքնին գիտական նորույթ չէ: Ինչ վերաբերում է համապատասխան իրավակարգավորումները՝ որոշակի չափանիշների համապատասխանելու հեղինակի մոտեցմանը, ապա հարկ է նշել, որ նշված չափանիշները, եթե ոչ ամբողջությամբ, ապա գոնե դրանց զգալի մասն օրենսդրորեն ամրագրված են: Մասնավորապես՝ անհարկի փաստաթղթեր (տեղեկություններ) պահանջելու դեպքերի բացառման, ինչպես նաև քաղաքացու իրավունքի իրացման ապահովումը նույն քաղաքացու կողմից իր որևէ այլ իրավունքի իրացմամբ պայմանավորելու վարչական մարմինների պահանջներն արգելելու վերաբերյալ որոշակի իրավական կարգավորում է ամրագրված «Վարչարարության հիմունքների և վարչական վարույթի մասին» ՀՀ օրենքի 3-րդ, 10-րդ հոդվածներով: Անձի դիմումը անթույլատրելի համարվելու վերաբերյալ (երբ այդ նույն հիմքերով և նույն պահանջով քաղաքացին իր դիմելու իրավունքը որևէ ձևով արդեն իսկ իրացրել է) անուղղակի կարգավորումներն ամրագրված են «Վարչարարության հիմունքների և

վարչական վարույթի մասին» ՀՀ օրենքի 50-րդ հոդվածի 1-ին մասի «գ» ենթակետով: հարկ է նշել, որ «Վարչարարության հիմունքների և վարչական վարույթի մասին» ՀՀ օրենքի 9-րդ, 10-րդ հոդվածների վերաբերյալ նույնաբովանդակ դիրքորոշում է հայտնել հենց հեղինակը ատենախոսության 90-91-րդ էջերում:

Ավելին՝ նշված նորմերի իրացման կապակցությամբ ձևավորվել է հստակ դատաիրավական պրակտիկա, որտեղ դատական ատյանները, մեկնաբանելով և բացահայտելով վերոնշյալ հոդվածներով ամրագրված նորմերի էությունը, նշել են այն չափանիշները, որոնք գրեթե նույնական են հեղինակի առաջ քաշած չափանիշներին:

4. Հեղինակն առանձնացրել է իրավական պաշտպանության ձևերը՝ դասակարգելով ընդհանուր ձևի և հատուկ ձև/եր/ի (էջ 57), այնուհետև մանրամասնելով նշել է. «Ընդհանուր ձևը դատական պաշտպանությունն է, որտեղ որպես միջոց ծառայում է հայցը, իսկ հատուկ ձևը պաշտպանության արտադարական կամ մինչդարական ձևն է, որը բաժանվում է վարչական և հանրային կամ հասարակական ձևերի. այսպեղ պաշտպանության միջոցը բողոքն է: Պաշտպանության դարական ձևն իրապես համարվում է ավանդական, հիմնական, բազմակողմանի, համապարփակ և, ամենակարևորը, արդյունավետ, հերևաբար անձն իր իրավունքների պաշտպանության համար, առաջնային կարգով իրացնելով իր սահմանադրական իրավունքը, դիմում է դարարան: Դարական պաշտպանությունն իրականացվում է սահմանադրական, քաղաքացիական, վարչական և քրեական դարավարության միջոցով: Պաշտպանության հատուկ կամ արտադարական ձևը հանդիսանում է անձի սուբյեկտիվ իրավունքների պաշտպանության հետ կապված հանրային հարաբերությունները կարգավորող ինքնուրույն իրավական ինստիտուտ, որն այդ պաշտպանությունն իրականացնում է առանց դարարանի օգնության կամ միջնորդության: ... Մարդու իրավունքների պաշտպանության արտադարական ձևն իրականացվում է պետական իշխանության մարմինների, վարչական մարմինների, դարախազության, մարդու իրավունքների պաշտպանի, հասարակական կազմակերպությունների և քաղաքական կուսակցությունների կողմից»: Այլ կերպ՝ հեղինակը իրավական պաշտպանության ընդհանուր ձև հանդիսացող դատական պաշտպանությունը (պաշտպանության միջոց

հանդիսացող դատական հայցով) չի դիտարկում որպես վարչաիրավական պաշտպանության ձև (պաշտպանության միձոց հանդիսացող բողոքով): Ինչը մեր կարծիքով լիովին հիմնավոր եզրահանգում է: Սակայն ատենախոսության 67-րդ էջում հեղինակը կատարում է տրամաբանորեն հակառակ ընդհանրացում և որպես վարչաիրավական պաշտպանության հիմնական ձև նշում է *վարչական ակտի, վարչական մարմնի գործողության կամ անգործության դատական կարգով բողոքարկումը*: ՀՀ իրավական համակարգում *վարչական ակտի, վարչական մարմնի գործողության կամ անգործության դատական կարգով բողոքարկման իրավական կարգավորման կառուցակարգը սահմանված է ՀՀ վարչական դատավարության օրենսգրքով*: Այդ կառուցակարգի մեկնարկը գործի հարուցման առումով տրվում է բացառապես հայցով (ՀՀ վարչական դատավարության օրենսգրքի 66-րդ հոդված):

Նման իրադրությունում ատենախոսությունից պարզ չէ հեղինակը դատական պաշտպանությունը (դրա միջոց դատական հայցով հանդերձ) դիտարկում է վարչաիրավական պաշտպանության ձև, թե՛ ոչ: Մեր կարծիքով՝ հեղինակը պետք է հստակ տարանջատեր վարչաիրավական և վարչադատավարական իրավական գոյերը՝ դրանց գործնական հարաբերություններում իրացման իրավայան գործընթացներով և այդ գործընթացների իրավական կարգավորմանն ուղղված ընթացակարգերով հանդերձ:

Ամփոփելով ատենախոսության վերաբերյալ դատողությունները՝ անհրաժեշտ ենք համարում նշել, որ **Մանե Վովայի Խաչատրյանի** (այսուհետ՝ հեղինակ) «**Մարդու իրավունքների վարչաիրավական պաշտպանությունը Հայաստանի Հանրապետությունում**» վերտառությամբ թեկնածուական ատենախոսությունը համապատասխանում է Հայաստանի Հանրապետության կառավարության 1997թվականի օգոստոսի 8-ի թիվ 327 որոշմամբ հաստատված «Հայաստանի Հանրապետությունում գիտական աստիճանաշնորհման կանոնակարգ»-ով թեկնածուական ատենախոսությանը ներկայացվող պահանջներին, իսկ ատենախոսության հեղինակն արժանի է ԺԲ.00.02. «Հանրային իրավունք (սահմանադրական, վարչական, ֆինանսական, մունիցիպալ, բնապահպանական, եվրոպական իրավունք, պետական կառավարում)»

մասնագիտությամբ իրավաբանական գիտությունների թեկնածուի գիտական աստիճանի շնորհմանը:

Ատենախոսությունը քննարկվել և երաշխավորվել է ԵՊՀ իրավագիտության ֆակուլտետի սահմանադրական իրավունքի ամբիոնի 2020թ. հոկտեմբերի 20-ի առցանց նիստում:

ԵՊՀ սահմանադրական իրավունքի
ամբիոնի վարիչ՝
Իրավագիտության թեկնածու, դոցենտ



Վ. Ն. Այվազյան

ԵՊՀ գիտական քարտուղար



Մ. Հովսեփյան